

Manfred Zirkelbach

MaZi-Ned auszudenke

Beim Bierbräue

Fostezeit. Wanns dause noch e weng kaald is, wanns hald offs Frühjohr näüs gedd, is im Schönaaer Bräuhaus Bierbräüzeit. Gehsd du do am Bräuhaus fürbei on es riechd so weng noch dem Trewer on nooch dem früüsch gebräute Bier, grichsde ganz eefoch Durschd, ob de willsd oder net. On do hats dann scho so manch Freibiergesichd automatisch Richtung Bräuhaus getriewe on drauf gewadd, dass där Bierbräuer gesödd hadd: „ Zu geh rei on versüchs hald, obs aach geroate is, des Bier“.

Es is scho orch lang här, ower es is ömmer noch e gern erzähld Gschichdle äüsm Schönaaer Bräuhaus vo Anno dazumal.

Där Michl wor Bräümeisder im Durfbräuhaus on här hadd grad alles fürbereid, wann die Bauer middochs komme, ömm ührn Hastrunk midd die Bodde obzehoole dehemm nei ührn Kaaler. Für alle Fäll on für ganz schbezielle Komerode hadd där Michl do debei en Bierkruuch nawed droo den Sudkessel parad für en kräfdiche Schluck zwöshedurch. Des is üwrichens heüzedooch noch Brauch im Schönaaer Bräuhaus.

Ower heüd früh hadd där Michel gsenn, dass üwer Nooch e winzich klee Mäüsle in den bereit geställde Bierkruuch neigfalle wor. Aus däre Mäüsfall isses hald dann aach nix mer rauskomme, des Dierle. Här hadd ower scho widder ganz drauf vergesse ghodd, daär Michl, bis off e moal där Paulus, für senn unbandiche Freibierdurschd bekannnd, in die Dür gschdanne hadd. „Aa do? Isses dann geroade?“ „Ich denks.“ „Muess des fürhär ned e moal versüchd wär?“

Do is dem Michl widder des Mäüsle in dem Bierkruuch eigfalle. „No ja, läss ich dr hald en Drunk ei.“ Also hadder dem Paulus en gscheide Schbruzz mid Bier neigelässe. „Prost, on es soll dr schmack on damid dr aach nix im Haals stecke bleid.“

Där Paulus setzt o, drenkd, schluckd zwösche durch e moal kräfdich, wörrichd aach e moal, ower här setzt ned ehr o, als bis där Kruuch kreideleer is.

Där Michl schdaund ned schlachd. „Hadds gschmackd“? Des glebbsde“! „Hasde nix gemerkd?“ Där Paulus schdrahd üwer es ganz Gesicht: „Mensch Michl, so e guet Bier hoo ich scho lang nix mer gedronke. Bloes, ganz zum Schluss, do muess noch so e klee Hopfebleedle dezwösche gewaasd sei.“

Ned auszudenke